



SAOPĆENJE ZA JAVNOST

Produžen pritvor M. K. i S. K. **Osumnjičeni za seriju od dvadeset teških krađa**

Postupivši po prijedlogu Tužilaštva Brčko distrikta BiH nadležni sud u Brčkom produžio je pritvor M. K. (21)* i njegovom bratu S. K. (23)* uhapšenim prošlog mjeseca zbog serije teških krađa u tom gradu. Zbog opasnosti da će ponoviti krivično djelo za koje se može izreći kazna zatvora tri godine ili teža kazna višestrukim povratnicima u vršenju imovinskih krivičnih djela pritvor je produžen za dva mjeseca.

U okviru istrage koja se vodi pod nadzorom Tužilaštva, Policija Brčko distrikta BiH uhapsila je prošlog mjeseca M. K. i S. K. iz Brčkog zbog sumnje da su zadnjih nekoliko mjeseci u tom gradu, nakon provaljivanja u zatvorene objekte, oduzimali imovinu privrednih subjekata i građana. Oni su, zajedno s D. N. (24)*, osumnjičeni da su od jula do početka novembra, pojedinačno ili u saizvršilaštvu, čak dvadeset puta provalili u trgovinske i zanatske objekte, sportske kladionice te u porodične kuće i automobile, odakle su zatim oduzimali pronađeni novac i druge vrijednosti. Sumnja se da su njih dvojica zajedno odgovorni za četiri slučaja, a da je u devet navrata S.K. nastupao sam, dok je M.K. počinio sedam teških krađa, sam ili u saizvršilaštvu s D. N.

Pošto su otkriveni i dovedeni u direktnu vezu s krivičnim djelima, Policija Brčko distrikta prošlog mjeseca lišila ih je slobode, te ih nakon kriminalističke obrade predala Tužilaštvu Distrikta. Da bi osiguralo njihovo daljnje prisustvo i uspješno vođenje krivičnog postupka, Tužilaštvo je nakon ispitivanja osumnjičenih podnijelo prijedlog sudu da im obojici odredi pritvor, što je sud prihvatio odredivši im pritvor u trajanju od jednog mjeseca. Prije isteka pritvora, a usljed ocjene da i dalje postoji opasnost da će ponoviti krivično djelo, Tužilaštvo je od suda zatražilo produženje ove mjere. Prihvativši tužilački prijedlog, sud je osumnjičenima M. K. i S. K. produžio pritvor za još dva mjeseca. Neovisno od odluke po žalbi, koju pritvoreni mogu izjaviti Apelacionom sudu Distrikta, Tužilaštvo i Policija nastavljaju istragu protiv trojice osumnjičenih za krivično djelo teške krađe (iz člana 281 stav (1) Krivičnog zakona Brčko distrikta BiH).

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

Tužilaštvo Brčko distrikta Bosne i Hercegovine 6.12.2021. godine

GLAVNI TUŽILAC
ZEKERIJA MUJKANović